



U okrilju najuzvišenijeg ajeta (Medina)

Hatib: dr. Husejn ibn Abdulaziz Alu Šejh

14. džumadel-uhra 1447. po Hidžri / 5. decembra 2025.

Hvala Allahu, Koji čuva svakoga ko se Njemu utječe od svake neugodnosti i Koji od njega otklanja svaku nevolju. Svjedočim da nema boga osim Allaha, Jedinog, Koji nema druga, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik. Allahau, smiluj se, blagoslovi i spasi njega, njegovu porodicu i njegove ashabe.

O muslimani, bojte se Allaha onako kako Ga se treba bojati i pokoravajte Mu se u blagostanju i u teškoćama. Allah kaže: “I bojte se Allaha, da bi vam se milost ukazala.” (El-Hudžurat, 10)

O muslimani, najuzvišeniji ajet u Allahovoj Knjizi, kako je vjerodostojno preneseno od Allahovog Poslanika, sallallahu alejhi ve sellem, jeste Ajetul-Kursija: “Allah je – nema boga osim Njega – Živi i Vječni! Ne obuzima Ga ni drijemež ni san! Njegovo je ono što je na nebesima i ono što je na Zemlji! Ko se može pred Njim zauzimati za nekoga bez dopuštenja Njegova?! On zna šta je bilo i prije njih i šta će biti poslije njih, a od onoga što On zna, drugi znaju samo onoliko koliko On želi. Njegov Kursijj obuhvaća i nebesa i Zemlju i Njemu ne dojadi održavanje njihovo; On je Svevišnji, Veličanstveni!” (El-Bekara, 255)

Ko uči ovaj ajet, bit će sačuvan od zala i šejtanskog uznemiravanja. U Buharijevom Sahihu navodi se da je Poslanik, sallallahu alejhi ve sellem, obavijestio da onome ko prouči ovaj ajet kada legne u svoju postelju, Allah pošalje čuvara koji ga čuva i šejtan mu se ne približava sve do jutra.

O vrijednosti njegovog učenja govori i sljedeći hadis: “Ko prouči Ajetul-Kursiju poslije svakog farza, između njega i Dženneta je samo smrt.” (Hadis bilježi Ibn





Hibban u Sahihu; brojni raniji i kasniji muhadisi ocijenili su ga dobrim zbog mnoštva puteva prenošenja.)

Ajetul-Kursijja sadrži dokaze tevhida – Allahove jednoće, na najpotpuniji i najsvеobuhvatniji način. Sadrži značenja koja ukazuju na savršenstvo Allaha, Uzvišenog – Njegovu veličinu, ljepotu i savršenstvo. Uzvišeni kaže: “Allah je – nema boga osim Njega.” (El-Bekara, 255)

Obavještava nas da je On jedini Istinski Bog, Koji zasluđuje sve vrste ibadeta, pokornosti i predanosti, a da je obožavanje bilo koga ili bilo čega drugog, mimo Njega, najgora vrsta zablude i najveća nepravda.

Zatim Allah opisuje Sebe riječima: “Živi i Vječni” (El-Bekara, 255).

On je Živi, Čiji je život savršen, potpun, vječan, bez početka i bez kraja, kojem nije prethodilo nepostojanje i koji nikada neće nestati niti iščeznuti. Uzvišeni kaže: “Ti se pouzdaj u Živog, Koji ne može umrijeti.” (El-Furkan, 58)

On je također Samoopstojeći, neovisan o Svojim stvorenjima (Onaj Kome ništa nije potrebno), Koji održava sve stvoreno. On upravlja svim stvarima; ništa ne može opstati bez Njega, ni u kojoj situaciji i ni u kakvim okolnostima.

Od savršenstva Njegovog života i potpunosti Njegove samoopstojnosti jeste i to da je savršen u Svom biću, svojstvima i postupcima, i ne obuzima Ga drijemež, ni san, ni zaborav, ni nehaj.

Poštovani vjernici, ovaj ajet istinito nas obavještava da je sve što je na nebesima i Zemlji Allahovo, stvaranjem, vlasništvom i upravljanjem. Sve je potčinjeno Njegovoj vlasti, sili, moći i volji. “Njegovo je ono što je na nebesima i ono što je na Zemlji!” (El-Bekara, 255)

A od Njegove veličine jeste i to da se niko ne usuđuje zauzimati kod Njega, osim s Njegovim dopuštenjem, i samo za one kojima je On zadovoljan, a to su sljedbenici tevhida (čiste vjere u jednog Boga) i imana (ispravnog vjerovanja).





“Ko se može pred Njim zauzimati za nekoga bez dopuštenja Njegova?!?” (El-Bekarea, 255)

Naš poslanik Muhammed, sallallahu alejhi ve sellem, koji je odlikovan najboljim i najvrednijim šefatom, zauzimanjem za ljude na Sudnjem danu, kada svi ostali poslanici budu govorili: “Moja briga, moja briga”, smatrajući da oni nisu dostojni te počasti, on će tada reći: “Ja ću se zauzimati”, zatim će pasti na sedždu, pred Allahovim Aršom, slaveći Ga i hvaleći, i bit će mu rečeno: “Podigni glavu, traži – dat će ti se; zauzimaj se – tvoje zauzimanje bit će prihvaćeno.” (Muttefekun alejhi)

O vjernici, Allah kaže: “On zna šta je bilo i prije njih i šta će biti poslije njih.” (El-Bekara, 255)

Ovo je obavijest o Allahovom savršenom znanju: o onome što je bilo, što će biti, i što nije bilo, i kakvo bi bilo da je bilo. To je znanje koje obuhvata sve stvari, prije postojanja, nakon postojanja i nakon nestanka, ono što je vidljivo i sakriveno, prošlost, sadašnjost i budućnost, opće i najdetaljnije pojedinosti: “On sve zna! (Njegovo znanje sve obuhvata)” (Taha, 98).

A stvorenja znaju samo osim onoliko koliko ih je On podučio, kako stoji u istom ajetu: “a od onoga što On zna, drugi znaju samo onoliko koliko On želi” (El-Bekara, 255).

I znaju o vjeri i kosmosu samo onoliko koliko im je On otkrio.

“Hvaljen neka si”, rekoše oni, “mi znamo samo ono čemu si nas Ti poučio; Ti si Sveznajući i Mudri.” (El-Bekara, 32)

“Reci: “Niko, osim Allaha, ni na nebu ni na Zemlji, ne zna što će se dogoditi.” (En-Neml, 65)

Isto tako, mi nemamo znanja o Njegovim imenima, svojstvima i djelima, osim onoga što nam je pojasnio u Kur’anu i sunnetu, onako kako su to razumjeli ashabi i tabiini.

O savršenstvu Njegove uzvišenosti i veličini Njegove vlasti govore Njegove riječi: “Njegov Kursijj obuhvaća i nebesa i Zemlju.” (El-Bekara, 255)





Ibn Kesir kaže: “Ispravno je da Kursijj nije isto što i Arš, a Arš je veći i veličanstveniji.”

Dakle, od savršenstva Njegove uzvišenosti jeste i to da Njegov Kursijj obuhvata nebesa i Zemlju, sa svim što je na njima i između njih, kako je preneseno od Ibn Mesuda i Ibn Abbasa, radijallahu anhum.

O vjernici, Allah je Silni, Moćni, za Njega ne postoji nemoguće, sve je pod Njegovim uređenjem i upravljanjem. Uzvišeni kaže: “Njemu ne dojadi održavanje njihovo.” (El-Bekara, 255)

Nije Mu teško održavanje nebesa i Zemlje, onoga što je u njima i onoga što je između njih. Naprotiv, to Mu je lahko i jednostavno. Sve je sćušno, bezvrijedno, ponizno i malo pred Njegovom moći. Stvorenja su ovisna i siromašna, u svojoj egzistenciji i održavanju, ovisna o Njemu.

Uzvišeni kaže: “Allah brani da se ravnoteža nebesa i Zemlje poremeti.” (Fatir, 41)

“Uz svakog od vas su meleki, ispred njega i iza njega – po Allahovu naređenju nad njim bdiju.” (Er-Ra’d, 11)

U završetku ajeta Allah opisuje Sebe najvećim savršenstvom i kaže: “On je Svevišnji, Veličanstveni” (El-Bekara, 255). On je, Svojim bićem, uzvišen iznad svih stvorenja: “Milostivi se nad Aršom uzvisio” (Taha, 5), a uzvisio se Svojom veličinom i veličinom, ljepotom i savršenstvom Svojih svojstava, Veliki i Uzvišeni.

Svevišnji Koji je Sebi potčinio sva stvorenja, i Kome se pokorava sve što postoji, i pred Kojim se poginju vratovi.

“On je uzvišen i veliki.” (Saba, 23)

“...i jedini On vlada robovima Svojim.” (El-En’am, 18)

On je uzvišen i velik u Svom biću, svojstvima i vlasti, i Onaj Koji je objedinio kod Sebe sva svojstva uzvišenosti i gordosti, kao što se navodi u hadisi-kudsiju: “Ponos je Moj ogrtač, a gordost je Moja odjeća, ko Mi, u tome, želi parirati, kaznit ću ga.” (Muslim)





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

O vjernici, veličajte Allaha kako dolikuje, dajte Mu mjesto koje Mu pripada, poštujujte Njegov šerijat i pridržavajte se Njegovih i Poslanikovih naredbi, bit ćete spašeni, uspjet ćete i postići sreću. Uzvišeni kaže: “Zato se Allaha bojte, o vi koji ste razumom obdareni, da biste ono što želite postigli.” (El-Maida, 100)

O muslimani, održavajte i redovno učite dove i zikrove koji su utemeljeni Kur’anom i sunnetom. Poučite njima svoju djecu i svoje porodice. Praktikuju ih danju i noću, i u svakoj novoj životnoj situaciji, jer u njima je veliko dobro i snažna zaštita.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

